

元
憲
集
一

元憲集卷一

宋 宋 庠 撰

賦

乾元節賦

炎歷四世天子坐法宮。憲宗軌深根寧極。遠聽高視。其仁如天。其道如砥。豐臺穆穆。爲綱爲紀。方且秋駕軫慮。宵衣致治。標甲臥鼓。張旃厚篚。至和薰而桀驚。革鴻澤淪而黷蠹暨。龜龍宅沼。牛羊避葦。民遠于罪。畫衣冠而知禁。吏久其職。保子孫而爲氏。禮無未補之闕。樂有旣盡之美。日月之所燭。霜露之所墜。舉踵延頸。莫不率俾。而乃辰居乎蟻。漢宇泰乎醴。粹起真想于黃庭。迦慶源于赤水。陶鈞之所獨運。聲教之所橫被。遐哉邈乎。越不可載而已。先是有司。據舊典輯元命。因誕彌之吉序。稽長發之休詠。考乾健不息之象。含元長體仁之性。作爲佳節。冠于甲令。將以合萬國之歡。啓千齡之聖。掩周漢而遐蹈。齒堯項而高映。寢明寢昌。惟天下正。則是禮也。宜我朝而爲盛。若乃仲呂鳴律。恢台御時。斗建于巳。舒將望義。授赤光照室之瑞。叶寶軫歌薰之期。內外欣踴。官師肅祇。於穆先靈。辰備宿設。善氣前應。游氛外徹。開閭闔之洪洞。廓紫宮之寥泬。飛龍抗殿。神鼉負闕。若夫宣室先帝之正寢。大火天王之明堂。啓稷嗣以辨等。率鴻臚而詔方。采物紛樹。衣纓焜煌。金匏畜響而待叩。籥翟旌勳而啓行。庭實萬品。天幕九張。臧鑾卓馬之觀。戴斗

占雲之鄉。啓丹文越効其質。毛車象載輸其祥。或布濩于外庭。或就望于西廂。其內則上宮頌老。袞衣繡裳。元侯顯父。珍圭判璋。麟定之親。信厚而在列。鸞雛之客。潔白而來翔。莫不委佩垂紳。肅穆端莊。以俟乎當陽。始乃警大庭。導初旭。纖羅靡動。羣陰盡伏。輦出于房。帝暉有穆。正法座于皇極。凝邃旒于元服。燦乎若瑤極之御羣宿。澹焉若天池之朝百谷。塗山會兮後萬玉。華封來兮善三祝。豈徒揚甚盛之節。蓋將儲難老之福。況乎鸞雛虹渚。天啓也。雖曠代而罕至。重瞳采眉。君表也。惟元聖而後備。畫堂甲觀。昭漢嫡之祚。金鑑露囊。盛唐宮之制。蓋所以謹帝胄之正統。鍾天元之粹氣。謹聲身而爲律度。聰神明而資孝悌。作我司牧。光有神器。若夫定默之至數。重熙之高致。蘊上業而未發。候昌朝而來萃。則不若是也。于是丞相率觴而進曰。臣聞德之所積者厚。則天之所報者隆。道之所召者遠。則神之所贊者聰。今陛下尊祖襲宗。寢威盛容。退奸士以進道。斥彫纂而敦風。嚮學乎金華之殿。因心乎長樂之宮。程百斤以忘倦。慎萬幾而執中。而猶翼翼以惠迪。謙謙而養蒙。宜乎繼萬世之典業。萬千祥于聖躬。煥至德而有融。等仙劫而無窮者也。臣不勝大願。昧死上後天之壽。制曰。都。此高厚之降康。宗祐之流光。俾爾熾而昌。俾爾壽而臧。朕其志哉。所不敢忘。恭舉公之觴。時左右皆稱萬歲。

幽廳賦

暗室迷陽。開疏就方。匪結錢而效飾。將修隙以闕光。森豎樞之寸漏。限橫杙而尋長。逼南榮之愛日。蔽高廡之飛霜。隱几于下。陳篇在旁。含階筠之媚色。洩盤蕙之幽香。況復霽景初和。游氛外滅。輕吹襲牖。頽陽

溢穴映故網而輕明。渺方紗而洞徹。但見野馬羣飛。織蟲族悅。或蟻螻之上擊。或醯雞而下頤。輕若毛舉。來踰電掣。隱見互舉。如翳如空。渺倦目以旁睇。監衆態之無窮。其來也就。照以交舞。其處也假。照而相攻。瞥若浮埃之聚。恍如纖靄之蒙。馳驚乎蠅頭之城。游揚乎蚊睫之宮。形不在乎手搏。聲難爲乎耳聽。嗟大鈞之賦象。何至細而兼容。忽輕飄之一至兮。遂消散而無蹤。

登應州古城賦

何茲城之巘峘兮。據東北之山巔。扼三關之走集兮。眺七澤之敞閒。喬木矗其雄立兮。森聳聳而刺天。翔風薄而長吟兮。雜下瀨之潺湲。南陵漸其峨岷兮。盡渺渺之雲烟。于是太陽啓暉。六幕澄霽。春塍如繡。春樹如薺。啼鳥壞堞。蒼烟故壘。登高遠望。使人心瘁。在昔峻宇層構。雕粉繡楣。車爭水度。蓋逐鴻飛。鼓鐘沸涌。冠劍陸離。抗障日之長袂。豔從風之羅衣。至矣哉。合從締交。結儔附黨。兵略地而鼓行。師椎牛而人饗。梟鳴牙中。梯舞樓上。出萬死而徇國。俟千級而邀賞。莫不光沈景滅。魂斷心折。千蒿斂魂。野薤凝血。同枯骨之死。安知譽堯而非桀哉。但見灌叢宿楚。與草多露。城狐不薰。臺鹿時聚。虎肉委蹊。豺牙當路。狖失木而號煙。鼯投林而嘯雨。遇發冢之詩書。對憂心之禾黍。曲池旣已平。高臺又以傾。古堦時見。荒榛自生。叢祠陰塢。虛聞松聲。凝睇弭節。悵然內驚。嘆人事之遞遷。孰長年之能執。壯率歡以俱往。耄引悲而前集。昔牛山之妄歎。顧二臣而飲泣。使爽鳩之無死。非吾君之所及。諒迭處而迭去。同寒暑之相襲。況乃僕本恨人。觸感增慕。歲月逝矣。江山非故。古旣古而嘗今。今雖今而將古。天愁人兮安寄。日難揮而催暮。命僕失

以効駕。吾將遵乎歸路。

夫人城賦并序

昔晉將朱序守襄陽。爲苻丕所圍。序母韓氏。自登城按履。謂西北角當先受弊。遂領百婢。及城外中女丁。于其角斜築二十餘丈。賊攻西北果潰。衆固新城。丕遂引退。謂此爲夫人城。至今叢祠遺基。巋然尙在。荆楚歲時。鄉人祀焉。仰其高風。慨然爲賦。其詞曰。循漢臯而西望兮。何層城之孤峙。披南烈之遺堞兮。號夫人之故壘。譙門堙而中塞兮。灌木森其相倚。勢鬱律以上出兮。下坡陁而榛圯。渺遺烈而未泯。眷高芬而可紀。昔典午之鼠首。屬苻丕之虎視。區區保乎江漢。峴一障乎北鄙。寇方甚于餓喙。地幾同于黑子。惟韓媼之慈訓。勵朱公之朴忠。仗天節以扞敵。據江域而臨戎。于時大羽若日。高旌如虹。桀黠同侮。跳梁四攻。防地中之甕缶。舞樓上之梯衝。伊君母之慷慨兮。誓喪元而靡悔。臨大難而克壯兮。懼危闔之先潰。率民婦而操築。培戰陣而相對。備之于條侯之西北兮。豈神機之我昧。果前蹈于厥角。率圖全于覆簣。嗟女子之綿薄兮。蓋中壺而是修。奉蘋蘩之常祀。承巾櫛之餘休。矧仗節而死難。非君子而可求。偉此母之挺操。亘終古而弗渝。趙指括以全宗。王勉陵而事劉。孟三徙以漸訓。介俱隱以無尤。雖先建于高躅兮。我無忝于前猷。若乃寶壙百尋。犀兵萬旅。推轂受命。建牙作輔。氣可蓋世。威能拉虎。或陷利而忘義。或飽飛而背主。輸天險于敵國。屈王國于亡虜。悲丈夫之竊號。曾緯餐而無取。儻死者之可作兮。非夫人而誰與。詠明德而不已。聊盤桓以延佇。

嘯臺賦

梁城南下。陳留右鄙。環道卻走。繩阡直指。控鄭邑之遺墟。得阮公之故里。抗孤臺兮數仞。撫頽垣兮百雉。木蓊蓊兮冠巔。棘棧棧而蔽趾。息予駕于層阿。披微徑而周視。坡陁隱軫。沿緣徙倚。徙倚兮奈何。懷人兮孔多。昔當塗之失馭。感羣俊之同波。予生不辰。道方薦瘥。呂鴻軒而被戈。嵇鳳舉而嬰羅。惟正德之思免。潛葆光以內照。狹世路之多辟。兆天衢而觀妙。悟跨俗以遺累。喜憑高而臨峭。于是戾止斯臺。恂悅徘徊。叩神谷以抽緒。憑鸞嘯而舒哀。其始也。創韻乎一氣。其餘也。淪響于九垓。吟將斷兮復尋。意彌往而逾來。志念君而宮轉。心感物而羽摧。激清飆于萬竅。納素氣于元胎。精感飛潛。氣周動植。天籟停響。龍吟輟息。獸將聘而拄喙。禽當飛而墜翼。寧蓄久而必愬。將愬之而未極。悲乎萬化弗停。遺基欲傾。桑冒田而非海。蕪隱壁而疑城。輟雖窮兮罷哭。酒徒美兮非醒。邑何知乎南巷。土奚樂于東平。但見豺獮狐語。梟翔虺驚。雉鷺鳴而輩作。鴈離離而孤鳴。覽陳迹以遐悼。莫髣髴乎遺聲。已矣哉。儻九原之不作。信豎子之成名。

瑞麥圖賦

天聖之六載也。陪京近地。宛丘奧封。厥有瑞麥。飛驛聞上。是時邦英臺彥。鴻儒碩生。被歡誦以沓臻。樂千齡之希遇。鰥臣不敏。敢揚言而賦之。曰。何聖辰之有感兮。見造物之流形。伊嘉生之育粹兮。亦稱珍而效靈。蓋茂昭于豐兆。故絕出于祥經。是月也。候司燁怒。節紀朱明。司徒謹土宜之法。遂人勤時政之程。畎畝鱗接。田疇砥平。非滅裂之攸縱。竟疏邀兮資生。青青交秀。芄芃向榮。或散穎兮共幹。或連岐而並莖。顧我

疆兮我理。悉如坻兮如京。民相勸而動色。士覩奇而震驚。俄具載于繪事兮。亟傳聞于禁庭。寔惟天之輔德。彰有言而順成。若夫冀草標祥。朱英薦異。茅三脊以儲祉。芝九莖而表瑞。信徒假于書稱。亦鳥足以擬議。請言瑞麥之可嘉也。協氣交生。大鈞封植。表天祐之孔昭。顯坤珍之有艷。宛彼神區。契茲景則。嘉種肇靈。秀穠敷色。浸潤兮芳澤之和。鼓動兮薰風之力。餘糧雲委。滯穗山積。故陳陳而相因。亦穰穰而亘測。宜乎允膺帝寶。紹隆皇極。豐功大業。日躋兮著明。溢美連休。月書兮不息。顧叢陋之微才。曷揄揚于盛德。

感雞賦有序

予寓居畿邑。有里中男子蔣福者。多畜羣雞。內一雞三足。其一足拳而弗用。一雞獨足。能飲啄嬉戲。與羣雞上下。噫祥眚之事。予不得而推。但感其物理之異。而爲賦云。伊元化之無私兮。播羣形以平施。紛肖象而寓質。若巧鈞之制器。鱗者俾夫沉泳兮。角弗施于猛鷲。引羽族而普觀兮。足惟兩而已備。苟損益于天分兮。匪生生之本意。何此匹鷄。埋絕常區。或蹠蹠而獨止。或疣贅而聯跣。並鳴翔于堞次。亦飲啄乎庭隅。徒觀其一。則綴不用之爪。牘無名之膚。象非同于海蟹。名有忝于陽鳥。其一則踐孤立之危。靡全形之德。追山變以同號。希商羊而並翼。寧真宰之好異兮。伊微禽之我惑。感天分之有常。循生涯而各得。不決拇而齟枝。詎日黔而浴白。蜮百足而蛇憐。蚓無心而土食。將減此而益彼。懼速尤而長慝。姑美惡之兩忘兮。庶元和之來宅。

德車載旌賦〔案〕此爲永樂大典所佚。今據宋文鑑及文翰類選增入。

君有至德。時乘大車。當偃革以無外。乃結旌而有初。奉駕陳儀。采物雖資于備設。鳴鸞示禮。旂旒匪俟于垂舒。順考前經。鋪聞往說。謂戎事以旣息。貴君車之有結。雍容撫軾。蓋藏飾以尙純。肅穆展鈴。詎垂旒而就列。蓋由抑乃盛飾。昭夫令名。雖冠品于輿服。蔑揚威于旆旌。肅軫無譁。方斂藏于旂厲。馳輪有度。靡赫奕于綏纓。且夫禮有質文。器隨用捨。車號乎德。則崇化于邦本。旌結其表。則示人于天下。意自象見。名非人假。君軒弭節。孰訝乎卷而懷之。國乘制容。益顯乎素爲貴者。是知車之用兮。充德以成大。旌之飾兮。輔威而孔昭。旣武怒之不作。信軍容而外銷。組轡啓行。陋郊旄之子子。錙衡遵路。殊風旆之搖搖。若然則動有彝儀。文無異色。雖嚴駕以備物。終去華而表德。故使禮典攸重。民瞻不忒。皇皇整御。始中括于采章。檻檻肅容。豈外揚于藻飾。用能上載明德。旁昭緝儀。自駕言而戾止。殊幅裂以藏之。升降惟寅。僅比非心之屋。章明盡屏。寧同止獵之綏。大矣哉。邦禮是崇。帝儀資始。實務德以垂教。必收旌而昭理。宜乎國容備而兵器銷。率由茲而盡美。

元憲集卷二

五言古詩

正月望夕供養大阿羅漢畫像作

端月戒熙陽。望舒秀圓極。洗心乘佳節。瞻像洗慈德。穆穆屋漏尊。虛堂與神寂。繪境紛自奇。法性非所得。人貌含天虛。髣髴若真覲。示現隨三界。精感超六識。華燈列清場。寶炷熏梵席。妙意隨春融。疑懷逐冰釋。欲讚已忘言。拳拳自終夕。

嘯臺

孤壁橫天畿。巋然表尋丈。恭承晉高士。嘗此據遐想。臨風挹勝軌。意若無今曩。當塗昔戰龍。典午方構象。忠賢履危渾。鱗羽嬰密網。烈烈熾邦刑。耿耿翦人望。嵇呂膏砥斧。濤舒受羈鞅。先生機且神。妙用包羣枉。兀爾謝將迎。隕然寄昏放。禮法雖我讐。智恬非外獎。惻愴廣武游。留連步兵釀。竭來桑梓國。憑高念長往。舒嘯萬籟先。浮精九皇上。歸禽宛頸還。秣駟臨芻仰。當日天地心。寥寥其悲壯。咄嗟涉千祀。隱軫存遺壤。臨岸知是非。俎豆猶仿佛。邑東故祠在焉我來一傾耳。城隅斷餘響。梟鶚愁空林。狐狸語平莽。高韻邈已徂。清銘復誰賞。唐人獨孤及爲嘯臺碑銘近年邑人浚池得之嘗聞史氏傳。塗窮輒招恨。正人與直轡。何代非流蕩。淳風日已微。投辭謝精爽。

入謁馬上作

殘月鑿鼓喧。中衢轆轤驚。九關忽洞闢。萬蓋黥雲布。燭亂建章星。塵迷華陰霧。車幅避鳴騶。鑾音聽朝御。嗟予亦何爲。遙此珍羣羽。野鶴載軒愁。狂狙裹衣怒。肅穆未央朝。蹢躅壽陵步。人生固有志。躁靜各成趣。生當伏農畝。乃爾汙賢路。峨弁束蓬顛。吞腥滿飢嗉。樂育過阿陵。增裨乏塵露。徒懷一割志。但恐流芳暮。且復埃淩巡。南山有場圃。

習彥威

四海習彥威。英英出江漢。高韻凌風翔。雕文奪星爛。感激陽秋辭。姦雄非所憚。蜀弱自爲正。曹強乃名亂。陰忤柄臣意。飄然去恩館。驅車自北門。四顧興長歎。終焉謝病免。猶得爲人半。緬矣身後名。臨風寄悽惋。邑子夜宿話余先疇蕪廢

臨邛久倦客。彭澤賦歸來。念我何爲者。趣時良殆哉。一身仕東觀。三載寄靈臺。望見故鄉樹。頻更緹筦灰。曉車愁蹇蹇。春耜負莓莓。虛名自韁鎖。豐壤成汙萊。日想社枌老。心知門柳摧。神阡迷馬鬣。栢表被狸災。一聞里人語。夜靜成多懷。他日還燕泣。前憂成誤哀。

留別知郡職方楊員外

予本草茅士。世無鐘鼎榮。在昔未勝冠。先疇弓冶傾。茹荼濱十死。屬續存微生。分遂甯牛飯。誰希莊鴈鳴。龍具泣妻子。練裙悲弟兄。慈誨斷軻織。遺書開晏楹。感激侏儒飽。呻吟裘氏聲。下武纂丕構。協風翔四瀛。

紛馳賁丘帛。高豎當衢旌。鸞翮不暇戢。驥材方自呈。車徒首燕路。冠蓋溢秦京。文章趙元叔。脣舌婁君卿。列邸曳裙入。羣公交幣迎。僕嘗不自料。奮迹希時英。弟子許都養。詞人嗤老僮。一旦褐衣召。千慙昆玉名。安知軾蛙賤。但覺軒鴻輕。初命六百石。漢延尉平關掌列侯城。居然憎操決。無術裨澄清。天炎屢來集。冤獄紛以盈。僕莅局以來。水旱爲沴。者各再茲吏受賕者。一請讓使臺檄。流離民屋征。結課諒無最。黜幽茲有萌。晚遭金閨彥。傳瑞提千兵。爲僚篤古義。賞善多新評。坐則席函丈。出則車連衡。高論天人際。細略米鹽爭。愚慮或窺管。嘉言茲報瓊。賞音非易遇。曠古難爲并。嚴惠不世出。蕭朱猶害成。何言末路日。獨契後周情。累洽帝圖盛。思皇賢路平。願言寄君子。始終同所營。

獻臣學士與余通書因成感詠

夫君班揚儔。抱槩羣玉府。久讀未見書。躬抽繫年譜。墜緒獲先秦。亡篇出東魯。上沂三皇墳。旁採百家語。怪牒汲郡來。幽經茂陵聚。英哲資繕藏。緹油盡刊補。蒸青勁竹殘。削誤規刀苦。種別踰九流。星羅軼千部。顧我寡見聞。蒙薰異倫伍。祕帙樂共披。譌文許交舉。家掘互紛綸。郵笥劇旁午。初無班嗣嗤。更免許慈拒。矧余羈官久。寂寞繫茅宇。禮乏贈酒甌。疑增照觴怒。尙賴啓新編。時時發聾聵。

予自到嶺外。居嵐瘴中。未嘗不以先死對治人。人見其浩然若有所得者。今歲在海外。遇寒食。因發家書。想望松楸。不能自理。偶成此詩示兒子。

春日自明霽。我心何鬱傷。草木競芬菲。飛鳴自頡頏。悄悄坐書幌。幽幽宴空牀。既無功名念。反音思白晝。

長愁來不自持。零落鴻鴈行。三過解澤流。六見槐柳黃。最憐小兒女。路遠不得將。生還一笑喜。死去埋他鄉。生死如循環。我師佛老莊。感此寒食節。新烟過鄰牆。松楸渺雲海。目極摧肝腸。書成附鱗翼。不如永相忘。何以慰目前。作詩示阿張。阿張孟堅小字

左散騎常侍東海徐公

徐公眞丈夫。不獨文章伯。江南兵未解。主憂臣慘戚。公願紓其難。苦求使上國。庶獲一言伸。少息苞茅責。其君驚且歎。執手涕沾臆。謂言知爾晚。何此忠義激。天子叱在殿。誚讓雷霆赫。公亦從容對。曾不渝神色。仁者必有勇。斯亦古遺直。書大略其小。我有春秋癖。所以此詩中。不言公翰墨。庶警事君心。勉旃希令德。

夏日晚出芙蓉堂

哲匠昔締構。故相文惠陳公所建。文樓面清池。回環水光合。左右雲容披。蒼烟限壘斷。空碧盈軒垂。蕙綠不待染。荷圓皆中規。戲魚觸新藻。幽鷺翹空坻。初筍半遺籜。殘跗猶抱枝。我來冰未泮。條此亘炎曦。節物一以換。余懷焉獨怡。內漸固陋質。本乏廊廟姿。印綬紛璀璨。旌旄森陸離。林狙裹華黻。野鹿駭金羈。負山力已竭。傾日心空疲。知此危殆辱。斯言非我欺。橫琴不成調。慷慨念歸期。

秋晚禁廬獨坐

霜日薄西牖。境寂趣自閒。風篁宿天籟。海碧沈雲山。宮樹未全落。棲鳥相與還。心疑蹈虛宇。跡乃塵清班。自顧丘壑志。何施軒冕顏。終當謝緋服。戢翼榆枋間。

孔明

漢家亂無象。賢才戢鱗翼。武侯羈王器。隆中事耕殖。堂堂劉豫州。介紹徐元直。一聞臥龍譽。三駕荒廬側。士爲知己用。陳辭薄霄極。說吳若轉丸。抗魏猶卷席。談笑馭關張。從容羈梁益。持邦二紀餘。君臣絕纖隙。浮埃蔽穹壤。大節淪金石。梁甫不復聞。懷賢涕霑臆。

筠亭

歲晚檀欒姿。山中映孤宇。聲繁天籟吟。影動仙幢舞。卽境是真如。黃花間幽圃。

嘗假馬于親舊不獲因感而成詠

東方昔借車。尼父嘗假蓋。一馬茲不全。夷涂出如閤。人無托乘寵。朝罕均茵載。策足本乏謀。臨風嗟有待。京洛富華廐。權奇出青海。翩翩陌上郎。滅沒爭星邁。珂音雜鸞響。韉勢動霞綵。東郭獨何爲。徒行履將敗。穀城主簿王崇者。少得養生禪寂之道。中年棄官入漢陰武當之間。邈與世絕。又有吳人山者。自遠攜母與王同隱。時余方貧病。慨然慕之。因爲詩代書以寄二子。且托王尋耕釣之地。相與邇者竝以敘懷云。

余本丘壑人。失計蹈塵網。軒冕忽韁鎖。風波若流蕩。高羽頗宏羅。奔驂債歸鞅。衆僞緣境滋。千憂共身長。進乏汗馬勞。居畏濡鵜賞。力命頻遘迍。幽憂思獨往。聞君集漢陰。遁世久忘象。因溜爲鳴琴。憑巖作煙幌。復有延陵季。亦善南越養。築宇近親仁。耕田或歌壤。且言掛瓢處。一徑捫蘿上。杳若御風遊。蕭蕭骨毛爽。

芝朮紛異苗。麝臙結幽響。老木森千尋。丹藤垂百丈。洞谷答嘯歌。雲霞代隣黨。咨予倦遊者。緬邈期眞賞。之子幸我憐。試煩翦幽莽。儻獲蝸牛居。卽謝海禽饗。時從漁父魚。聊植仙人杖。漸脫區中緣。永託無生獎。

和答李學士見寄長韻

璇源多清派。蘭谷無絕芳。之子相門裔。高才映周行。妙年弄文史。雅志含圭璋。中歲困官簿。銖兩爭低昂。一通金閨籍。荏苒潘鬢霜。剖符屢麾阮。執戟更疲揚。聞君近多暇。歸偃三經堂。左右褫紳組。縱橫羅巾箱。安驅仁義塗。弭節名聲場。戰酣道始勝。心泰無攸戕。壯思挾飛藻。詔我臨霞章。我時坐鈴閣。寂寞如禪房。開緘一快讀。雋味腴且長。高義溢句流。清風隨篇翔。感人不無意。在水河湯湯。吾匪辯音者。空冀懷仁藏。矧屬歲躔暮。百卉皆芸黃。何以謝君子。松柏同蒼蒼。

和答吳充學士見寄長韻

多士秀王國。珍羣驚天衢。其間延陵季。煜煜承華跗。盛藻班蔡流。芳年終賈徒。籤芸擁石室。札綈紛鴻都。刊僞富清暇。壯思彌天隅。投我塵外什。粲然風義俱。幽襟恣申詠。不覺頽陽烏。渴吻漱仙液。饑腸涵道腴。衰翁牽夙尙。騷雅嘗馳驅。疲足道雖頓。流波心未渝。過門輒大嚼。臨博猶狂呼。詎云獲眞賞。聊復愜所娛。矧繁絕唱贈。無脛來明珠。報之乏瓊玖。寶玩徒區區。

歲晚許昌城隅登樓作

孤城何巘峿。西北有層構。我來一長眺。正迫歲陰候。嚴風挫萬物。霜雪復交寇。冬日苦易頽。義車劇馳驟。

宵月不相讓。空弦映矢殼。潦收陂面闊。水落山骨瘦。生平丘壑心。顧慕獨延脰。箕峰紫氛結。潁瀨瓊波漱。想像逃名夫。幽居翳仙竇。願言追遐蹤。人間謝譏詬。

天禧初。僑寓安陸。有宅一區。嘗于齋前手植橘樹。纔尺餘許。未幾擢第。隨牒遊方。天聖庚午。冬屏居。畿邑守舍兒。自安陸饋余丹橘一篋。因曰。此卽齋前所植。撫物懷舊。悽然不平者久之。因成感詠。昔年封藁栽。生意頗柔脆。今茲見丹實。落落如星麗。斯果號難成。常踰豫章歲。此木不十孤根何爲者。尙記吾廬地。蔽芾詎因棠。連蜷乃同桂。厥包千里遙。守舍重緹惠。金顙照病眸。霜津益瘠肺。卻算去里年。十聽秋鴻唳。無復陸績懷。寧圖李衡計。他時攀樹悲。詎減金城涕。

歲晏出沐感事內訟一首

山海有完士。希世無良籌。偶穿東郭履。遂別野人舟。不恥篆刻賦。來肩英俊游。私智甚臆短。塵容若鴟愁。備員太史氏。補屬富民侯。(案)漢書田千秋封富民侯。唐人避太宗諱。改民爲人。此詩原本作富人。今改正。姑學了官事。何嘗分主憂。日貪斗食利。歲感星墮周。中都富才彥。方駕若龍蚪。茂先喜史漢。平津治春秋。高文用司馬。格五寵虞丘。問闊路逢葛。繽紛人召鄒。桑羊興賈豎。安國出繯囚。汲鄭貴交盛。徐陳英藻遒。況乃天下樞。雄雌來九州。衣冠徑復道。鼓吹出長楸。席上萬錢箸。橋邊八列騶。雍容緩魯袂。意氣拂吳鉤。咨予良不韙。瓠甕廁珠璆。吹竽昔已濫。在梁今可尤。臺閣魏舒被。風霜蘇季裘。有志謝軒鶴。無機防海鷗。擬竣杜陵課。誅茅歸故疇。

送上元勾簿吳昌卿

長安琴鼓喧。里舍隙塵曉。有客駐歌驪。歸途指江徼。晨庖爨蘇冷。窮巷鄉輿少。乃肯顧我廬。歡言復悲嘯。悲嘯誠易知。夫君韻經奇。才高洛陽賈。賦動楚湘纍。平昔應賢詔。覽德揚英蕤。孚尹傾寶肆。沛艾絡仙羈。獻書北闕下。對策東堂垂。逢吉旦兼暮。諧音墳且隄。天官選初筮。黃綬聊藏器。三釜樂及親。尺檄甘爲吏。邇來預冬集。再調鬱奇意。羣公亟爲言。力命乃相戾。奏牘輒報聞。官書責勤茲。簿領百里佐。風煙六朝地。銷魂南浦行。拄頰西山氣。君子永來譽。勝襟無累欵。行矣勿載譁。鄉粉方省家。春曉碎溪月。曉颿弄江霞。長洲紛藉草。故樹雜生花。予心若爲處。歲晏竚疏麻。

京師故僚以余退居近畿數賜存問因敘懷自感

病餘頗厭肉。欣得僧廬蔬。僧牕亦明潔。可以觀我書。弟兄冷相對。因著柏酒醉。醉餘欲拈筆。狀乃爾狼狽。我老固有素。未至形茶具。其事故可知。寧復論年數。阿連吾語汝。我計當何取。學道旣無成。何如事農圃。

冬至攝事南郊齋宮感懷作

履至謹冬祀。攝職叨上公。洗心奉明誠。祇宿城南宮。芳歲正逾莫。熙陽殊未融。西郊淡頽景。北牖來朔風。驚野騁歸獸。綠雲號征鴻。夕坐無晤言。情條結深衷。自撫韋布陋。奚堪廊廟崇。觀瞻動衆目。踟躕愁我躬。自古經緯才。因勢猶汗隆。夔高值虞奮。孔墨遭周窮。如何一介士。蔑著橫草功。仰被天宇施。遂濟人爵豐。較能劣涓瑤。荷寵踰華嵩。物理自非是。神鑒安可蒙。區區謝病志。終冀回天聰。

時已三上表乞退